

Nagaland nunga Watershed Yatra Campaign tenzükogo



State level Watershed Yatra Campaign tenzükba sentong nung Advisor, Land Resources, G. Ikuto Zhimomi-i jembidang tangokba noksa nung angur.

Dimapur, Tsüklai/February 05 (TYO): Directorate of Land Resources, Kohima nung February 5, 2025 nü Watershed Yatra Campaign tenzükba state level sentong ka agiogo, kong Advisor, Land Resources, Nagaland, G. Ikuto Zhimomi tetushi süa jaoker ama dena liasü.

Kevekha Kevin Zehol, NCS, Chairman, SLNA, Nagaland and Commissioner & Secretary, Land Resources lenisüba kübok iba sentong ya agi, kong Advisor G. Ikuto Zhimomi-i iba sentong ayongzükba asoshi tenüngsang agütsü aser tzü agi anünga aser

ali pongzuka bener aoba tebilemsü asoshi ajaki shilem agütsü nüngdaker ta ashi.

Sorkari community based watershed management projects tem yarir ta pai ashi aser iba sentong yagi tarutsü putu asoshi ali aser tzü kumdanga amshiba nung yaritsü ta ashi.

Albert Ngullie, CEO, SLNA, Nagaland, and Director, Land Resources ajanga sentong nung jembidang kija aser lokti sasep nung tzü kumdanga amshitsü asoshi awareness agütsütsü ayongzuka liasü.

Iba sentong nung tzü wazuka ayuba aser sustainable

agriculture nung shilem tajung agiba aluyimer nem tetushi agüja liasü aser iba sülen Pradhan Mantri Kisan Sampada Yojana - Watershed Development Component (PMKSY-WDC 2.0) nungi teyari agir Kekhrielezo Zuyie, Proprietor, KK Wood Touch Furnitures ajanga tajangshiba lemsatep.

Sentong nung ZubZub India indang Founder aser MD, Pelenuo aser Ruopfuzhanuo Whiso, Fourth Runner-Up, Miss Universe India 2024 nungeria tzü wazuka ayutsü aser ali samaa aoba nungi kumzüksü atema jembia liasü.

Foreign host nungi teyari kumdanga agütsü metetdaksür

Dimapur, Tsüklai/February 05 (TYO): Ministry of Home Affairs (Foreigners Division) ajanga State Governments/UT Administrations ajunga indang Chief Secretary tem dang FCRA, 2010 nung aibelen ketdangsürtem temi Hospitality magizüksü tekumdangtsü metetdaksüogo.

Ketdangsür kari Ministry nungi jelia Foreign Contribution (Regulation) Act, 2010 o (FCRA, 2010 kübok temelaba magie foreign host nungi foreign hospitality agizükba osang angashir, ta sangdong ajanga

ashi. Foreign Contribution Regulation Act, 2020 (FCRA) nung shia aliba aser iba kübok ozüng yanglua aliba ama Form FC-2 nung jelia hospitality atema temelaba meshia FCRA portal nung agütsütsü. Iba dak sendakba nung teinyaktsü tejangja link<https://fcraonline.nic.in/home/PDFDoc/Guid-ForeignHospitality.pdf> nung angutsü.

FCRA, 2010 kübok jelia temelaba magie foreign hospitality agizükba mesüra application form (Form FC-2)

nung shia maliba host nungi hospitality agizükba ya FCRA ozüng nung aibelenba lir aser iba Act kübok temerenshi lir, ta sangdong ajanga ashi.

Ano temulung melemettsüsa aliba foreign hosts nungi foreign hospitality agiba ajanga security tsütsü timtem tulu alitsü akok aser linük tejangraba nung masütsü akok.

Anungji FCRA 2010 aser iba kübok ozüng yanglua aliba sülen shidak anidaktsü ketdangsür nem tapet totuyuba agütsütsü ayongzükba, ta sangdong ajanga ashi.

Tuensang nung Online Registration of Birth & Death training agütsü



District Economic and Statistical Officer, Tuensang, P. Shokum aser Economic and Statistical Officer, Nzanbemo Kithan den shilem agirtem angur.

Dimapur, Tsüklai/February 05 (TYO): Tasoba aser tasüba tenüngtem online ajanga züluokba (Online Registration of Birth and Death) indang training tanabuba ETC Hall, Tuensang nung February 5, 2025 nü District Economic and

Statistical Office Tuensang ajanga ayongzuka agütsüogo.

P. Shokum, District Economic and Statistical Officer, Tuensang ajanga iba training sentong indang tongmelang agi rateta ashi, koba shisalen sayur Nzanbemo Kithan, Economic and

Statistical Officer ajanga nisung asoba aser asüba tenüng züluoktsü kota tongtipang, Online Registration of Birth and Death aser Civil Registration System (CRS) indang inyakyim rateta ashi.

Iba training nung nisung ajak agi 90 dena liasü.

Committee of Privileges and Ethics senden ayonger

Dimapur, Tsüklai/February 05 (TYO): MLA aser Chairperson, Committee of Privileges and Ethics, Moatoshi Longkumer-i sangdong ka nung Committee of Privileges and Ethics (2024-2025) indang senden ka February 14, 2025 anüngdang 11:00 ako nungi

C. Chongshen Committee Room, Assembly Secretariat, Kohima nung ayongzükba metetdaksüogo.

Iba senden nung Committee züngsem ajak medema arua adentsü sangdong ajangasa ashi.

DPRO Mokokchung-i metongshitsür

Dimapur, Tsüklai/February 05 (TYO): "75 buba Jangpetkong Senso Mungdang" ta sür osang ka Nagaland Post aser danga media platforms nung February 1, 2025 nü adokba nung tetushi süa jaokeri

ashibaji "asen lima nung Khristan yimsü asoba yimtsüng mezünpur rongnung ka" ta züngdaktsüner, ta DPRO, Mokokchung sangdong ka ajanga ashi. Aibelenba asoshi sasar, ta sangdong ajanga ashi.

Tuensang nung ita ana angati training agütsü

Dimapur, Tsüklai/February 05 (TYO): Pinnacle Skill Dimapur nung March 15, 2025 nungi tenzuka Hair cutting /styling/ shaving/Colouring/ Massaging/ Sectioning/ Hair dying/Facial amala nung ita ana angati training agütsü Tuensang District nungi jangra alirtem tenüng meshir, ta Deputy Commissioner, Tuensang, Lithrongla Tongpi Rutsa-i sangdong ka nung ashi.

Iba training nung District

nungi nisung ti agütsü aser candidate ya arishi küm 18 asütsüla aser Class 8 pass sür alir asütsüla.

Jangra aliba candidate temi Deputy Commissioner Office, Tuensang indang Development Branch nungi February 5-14, 2025 anogotem office mapang arua admission form meshitsü akok. Form ya February 21, 2025 tashinung agütsütsüla, ta sangdong ajangasa ashi.

Mokokchung nung Mission Shakti awareness agi



Anava Hospital Mokokchung nung tangokba noksa ka nung CMO Mokokchung aser DHEW nungi staff aser police tem angur.

Dimapur, Tsüklai/February 05 (TYO): Mission Shakti atema awareness campaign den PC & PNDT Act 1994 reprangshimba aser mapa kuma inyakba sentong ka February 4, 2025 nü Anava Hospita, Mokokchung nung agia liasü.

Iba sentong ya Beti Bachao Beti Padhao (BBBP) Mokokchung kübok District Administration aser SANKALP: District Hub for Empowerment of Women - Mission Shakti ajanga ayongzuka liasü.

BBBP nung iba Act mapa kuma inyaktsü ya tongtipang lir, kong Act ya shidak inyaker asü masü ta diagnostic centers aser mozüki tem mapang shia survey agir.

Iba Act nükjidong ya kinü tanur tetsü tepok nung lia tetsür-tebur jangjaba yimya nokdangtsü asoshi lir.

Iba inspection ya police, Chief Medical Office (CMO), Mokokchung nungi staff aser DHEW staff, Mokokchung lia agia liasü.

Kohima nung 13 Assam Rifles firing exercise alitsü

Dimapur, Tsüklai/February 05 (TYO): Deputy Commissioner, Kohima, Kumar Ramnikant, IAS ajanga nüburtem dang sangdong ka agütsüba nung, Kohima nung aliba 13 Assam Rifles pur Firing Range, Kohima Garrison nung small arms firing exercise agütsü, ta metetdaksü.

Anungji Kohima jila kübok yimtsü, ward ketdangsür aser Panchayats tem dang iba mapang Firing Range telungi February 28, 2025 tashi maitsü mesüra shiruru anir maotsü ayongzükba, ta sangdong ajanga ashi.

Iba sangdong ya nüburtem lendong timtem nungi jenbua alitsü mechi agütsür.

USnungi meindokba104Amritsar tonga aruogo



February 05, 2025 nü US nungi meindokba India nungertem US sepaitem indang tayimtsü ka nung Amritsar nung aliba Shri Guru Ramdas Ji International Airport tonga aruba mapang tangokba noksa nung angur.

New Delhi, February 05 (Agencies): Bodhbarnü US sepaitem indang tayimtsü ka nung US nungi meindokba India nung 104 Amritsar yimti nung aliba Shri Guru Ramdas Ji International Airport tonga aruogo, ta osang ka ajanga metetdaksü.

Taoba ita Donald Trump-i US Tir tenangzükba agiba sülen US nung ozüing benokba agency balalai ozüing alema arua alir bendangertem mita ao tenzuka liasü.

Osang angazükba agi, US nungi aruba India nung 104 nungjagi 30 bo Punjab nungi liasü; Haryana nungi nisung 33, Gujarat nungia nisung 33, Maharashtra aser Uttar Pradesh na nungi nisung asemsem aser nisung ana Chandigarh nungi liasü.

Tang tashi nungbo Ministry of External Affairs-i official sangdong kecha memetetdaksü.

US sorkari ozüing alema arua linük nung alir India nung

104 ya mezüingbuba shilem nung meindokba lir; tarutsü nunga ano India nunger aika meindoktsü.

Punjabi nunger aika tesem ka nungi kati oa tesüsa America tonga ao mesüra tanga lenmang balala ajanga sen lakh aika indoka ozüing alema America-i oa liasü.

Ano külen tanga osang ka nung, North American Punjabi Association (NAPA)-i Punjab state sorkar dang Bodhbarnü US nungi meindokba India nungertem nem teyari agütsüsa atema rehabilitation fund tenzüksüla, ta mepishia metetdaksü.

Osangbener den jembidang NAPA executive director, Satnam Singh Chahal-i, "Parnok teimbaka arrshi küm 20-30 tsüingdapur lanurtem lir, parnok aikati ozüing alema US-i aotsü atema tsüraburtem dang senotsü aika meshia liasü. US-i oa liner Punjab nunger taintemibo inyakyim shidak ajanga dang US-i aoer," ta

metetdaksü.

Tang India-i meyipa arurtem nem teyari magütsüra parnoki loktiliba aser rongsenketsüing tsütsü timtem aika ajurutsü; mapa manguba tebilemstü aser mental health mejungi akümtsü aser ozüing alema inyakba mapatem kanga bulua akümtsü, aser ibaji ajanga Punjab sorkar tekolak menüdaksütsü, ta pai metetdaksü.

"Item lanurtem teimbakati pei tarutsü jenjang tajungba akümtsü mangdang yur kidang nungi apuso saka meyipa yokogo. Shingaia parnok meyarira parnok kibongtem aser loktilibai timtem ajurutsü. Parnok nungita yaritsü atema Punjab sorkari khuret benzüksüla," ta Satnam Singh Chahal-i ashi.

Paisa, India-i meyipa arurtem atema state sorkari skill development programmes, mapa maongka aser mental health counselling katsütsü atema senotsü lezmüksütsüla, ta mepishia metetdaksü.

Gujarat nung Uniform Civil Code atema luden ka tentet

Ahmedabad, Tsüklai/February 05 (Agencies): Gujarat state nunga Uniform Civil Code (UCC) benoktsü atema draft bill renemtsü asoshi Supreme Court nungi anisüingzük aliba judge ka leniba nung committee ka tentetogo.

Gujarat Chief Minister, Bhupendra Patel-i, züingsem pongui akümba committee nung tekolakji taoba mapang Supreme Court nung judge Ranjana Desai lir; iba committee-i anogo 45 tsüingda report renema agütsütsü, ta metetdaksü.

"Uniform Civil Code (UCC) asadangtsü aser iba atemaji draft bill ka renemtsü asoshi onoki taoba mapang Supreme Court nung judge ka leniba nung committee ka tentettsü telemtetba agiogo," ta pai metetdaksü.

Committee nungi report

anguba sülen state sorkari state nung UCC benoktsü atema telemtetba agitsü, ta Chief Minister-isa metetdaksü.

Tan ita tetenzüklen Uttarakhand nung UCC mapa küma benokogo; linük nung UCC mezüing benokba state ji Uttarakhand kümogo.

Yaküm Independence Day anogomong sentong nung jembidang Ato kilonser, Narendra Modi-i, "Iba onük (UCC) nung o talangka lemtepa aruogo. O entepa jembiba sülen, nüburtemi shimba sorkari iba telemtetba agia linük tesem ajaklen benokba tajungba asütsü ta telemtetba agi. Supreme Court-ia linük nung UCC benoktsüla ta aiben jembio. Linük temzüing aser linük temzüing yanglurtem tangatetba nung ajemdaker onoki secular civil code ka benoktsü atema inyaksangshidar," ta metetdakja liasü.



February 05, 2025 nü New Delhi nung assembly election agiba anogo nung polling station ka nung Delhi Congress Tir, Devender Yadav-i vote agütsüba sülen pa temeyong nung vote agütsüba temaitsü sayudang tangokba noksa nung angur.

Delhi nung BJP-i takok angutsü exit polls ajanga asadangtet



February 05, 2025 nü New Delhi nung assembly election agiba anogo nung taoba mapang Delhi chief minister aser Aam Aadmi Party (AAP) National Convener Arvind Kejriwal den tetsü Gita Devi o tebu Gobind Ram Kejriwal na, Kejriwal kinüingtsü Sunita aser par jabaso Pulkit nungeri vote agütsüba sülen tangokba noksa nung angur.

New Delhi, Tsüklai/February 05 (Agencies): Bodhbarnü Delhi nung assembly election agiba sülen nikongdang 6:30 ako süir exit polls osang sangdongogo.

Assembly menden 70 aliba Delhi nung BJP-i menden teimba nung takok ngua sorkar akümtsü, ta exit poll balala ajanga asadangtetogo.

Matrize poll ajanga, BJP-i menden 35 nungi 40 nung takok angutsü, AAP-i menden 32-37 angutsü aser Congress-i

menden 1 nung dng takok angutsü, ta asadangtet.

Peoples Pulse poll ajanga, BJP-i menden 51-60 angutsü, AAP-i menden 10-19 aser Congress-i menden ka nung danga takok mangutsü, ta asadangtet.

People's Insight poll ajanga, BJP-i menden 40-44, AAP-i menden 25-29 aser Congress-i menden 0-1 angutsü ta asadangtet. Pollster P-Marq ajanga, BJP-i menden 39-49, AAP-i menden 21-31 aser

Congress-i menden 0-1 angutsü ta asadangtet.

JVC-i, BJP-i menden 39-45, AAP-i menden 22-31 aser Congress-i menden 0-2 angutsü ta asadangtet. Chanakya Strategies-i, BJP-i menden 39-44, AAP-i menden 25-28 aser Congress-i menden 2-3 angutsü ta asadangtet.

Poll Diary-i, BJP-i menden 42-50 nung takok angutsü, AAP-i menden 18-25 aser Congress-i menden 0-2 angutsü ta asadangtet.

WeePreside-ibo, AAP-i menden 46-52 angutsü, BJP-i menden 18-23 aser Congress-i menden 0-1 angutsü ta asadangtet. DV Research-i, BJP-i menden 36-44, AAP-i menden 26-34 aser Congress-i menden ka danga mangutsü ta asadangtet.

Bodhbar nikongdang 5:00 ako tashi nung Delhi nung vote agütsütsü temsüa alir shilem 57.8-i dang vote agütsü.

Taoba mapangtem nunga exit polls ajanga AAP-i menden angutsü asadangtetba aika tai liasü, anungji exit polls osangji tai, ta AAP-ibo shiogo.

Bangladesh den arrtsülen atsü shilem 79 bo renemogo

New Delhi, February 05 (Agencies): Bodhbarnü Parliament nung Union Ministry of Home Affairs-i, India-Bangladesh arrtsü nung atsü shilem 79 bo renemogo aser tanüingba shilem nung maparen maneni inyakdar, ta metetdaksü.

Ministry of Home Affairs-i, India-Bangladesh arrtsü kilometer 864 nung tang tashi atsü matsü, aser iba nungji atsü matsütettsüsa aliba kilometer 174.5 densema lir, ta ashi.

Minister of State for Home, Nityanand Rai-i, "Atsü atsüba project merenemetetbaji ali agiba, Border Guard Bangladesh (BGB)-i ashishiba, mapa inyakba mongpu mapang

aser anentsüh kulitem ajanga lir," ta metetdaksü.

Lok Sabha nung tasüingdangba ka langzüdang Rai-i, India-i Bangladesh sorkar dang arrtsülen atsü atsüba densema security atema inyaksangshi ajakji sorkar ana tsüingda aser BSF o BGB sepaitem tsüingda agia aliba tezüingzüktep kübok inyaksü aser inyakyim shidak beshitsü ta metetdaksüogo, ta ashi.

"Tamalen tezüingzüktep agia aliba ama Bangladesh-i inyaksü, ta India-i imlar aser arrtsülen ozüing alema inyakba mapatem nokdangtsü atema amalitepa inyaksü imlar, ta India-i Bangladesh sorkar dang shiogo," ta minister-isa metetdaksü.



TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 06, 2025

Alimai Donald Trump nungdaker

- P *Tiamongba Aier*

United States of America nung 47 buba Tir Donald Trump-i mapa tenzüker ita ka majungdang temelenshi aika bener arutsü atema executive orders nung sign süa arudar. Item rongnung tongtipangtemji election magidang pai nangzükba ama US den shishilembaba linüktem dang nungi tax talila meshitsü, özüng alema arurtem pei pei linüki meyipa yoktsü aser alima nung rara balala anendaktsütsü onüktem dena lir. Atangji Trump-i nangzükba ama US nung özüng alema arurtem putena parnok aruba linüktem yokba mapa tenzükogo aser anogo ishika tejaklen US den shishilembaba linük kar indang tax ajungketba osang metetdaksüogo. Alima nung nisung aikati Donald Trump ya yiar, tekolok meshitak, angbangyima inyakba tanishir, suwa küptet... ano tenüng tamajung aika ajar. Ajisüaka yashi Israel Prime Minister Netanyahu-i Trump dang olen tongtipang ka shiogo aser ibaji "Nai tangari manguba angur. Nai tangari mejembiba jembir aser nisungtem nü dak mamangi aoksatepba sülen, tatem nung nai (Trump) ashibaji shitak ta angajema arur." Anungji reprangdanga aru nung Trump-i meinyaktetsü mesüra mekoktetsü mapa indangsa jembir saka tatem nungbo pai atangji itemji alima dang inyakteta sayua arur. Taoba nung pai 45 buba US Tir inyakdang Russia President Vladimir Putin aser North Korea President Kim Jong Un na den-a ajurutepa sensaksemba ajanga nübortem aoksadakja liasü. Anungji Donald Trump-i election matongdang nangzükba mapa aika inyakteta aotsü ama bilemer aser pai nangzükba ama telemtetba kar agia mapa tenzükogo. Taoba ita pai US Tir mapa ano magizükdang yongi Hamas aser Israel tsüngda yimjung tenangzüktep agitepa liasü aser iba ajanga Hamas-i Gaza nung pua alirtem chiok tenzükogo. January 20 nung pai President inyaktetsü tezüngzüktep magidang Hamas-i pua alirtem mechiok nungbo Middle East nung molumi ajurutsü ta Trump-i kümdangtsü olen ka shia liasü aser iba amaji January 17, 2025 nü Israel aser Hamas tsüngda ceasefire tenangzüktep agia liasü aser Trump-i President inyaktetsü anogo ka jakdang- January 19, 2025 nungi iba tenangzüktep mapa kuma tenzük. Alima nung nübortemi kechi komar ka jembiaaka aser bilemaka, Donald Trump dak lenisütsü sempet balaka lir aser iba ya Tsüngremi pa nem moatsüba ama bilemer. Kechiyong alima nung tashitaitiba linük ka nung President inyaktetsü nübo ya Tsüngremi ang shimer asütsü akok ta amanger. Nagaland nung özüng alema Miya nunger aruba atema asenoki tebilemtsü khuret tulu abener aser asenoka tarutsü anogotem Tripura nung lisopur tajemba ser aliba tia ya ajurutsü südi ta tsübutepa bilemer. Süra, US nung linük paika nungi nisung million-sa million özüng alema oa alibaji tebilemtsü khuret tulu ka masü na? US den shishilembaba linüktemi parnok dangbo tax onsara meshir saka parnoki yokba atemabo tax ajema agütsür ta asubajia tim asü masü? Tesem ka nung rara adokba ajanga alima ajungalen kongshir aser talisa iba ajanga rongsenketzüng tsütsü timtem bentsür arur. Iba jagi Donald Trump-i taoba mapang Tir inyakdang alima nung rara madoktsü atema amokmerena aru aser atangji rara tasen kecha madoki dang pa kümsük tembanga inyak. Ajisüaka, pa melenzüker Joe Biden mapangbo Russia-i Ukraine amak, China-i Taiwan amokmerentsü tenzük aser Hamas-i Israel amak. Anungji Trump-i pa President inyakdang alima nung rara balala anendaktsütsü aser rara tasen madokdaksütsü ta nangzükba atema tenüngsang agütsütsü dalang masü na? Hao, pai yimsüsür kati jembiba ama mejembir, teimba ka o teküprak aser tulu dang jembir, saka pai ochi aika jembir masü na? Tsüngremi tetenzük nungi alima nung tetsür aser tebur dak alaka tangar shinga meyanglu ta pai ashibaji ochi o masü na? Tanü alima tensa nung pa ama lennirtem ya nungdaker, tetsübu maliba, tanak dang tanak temesüng dang temesüng ta shitetba alima anitsüpur nisung nungdaker. Tanga linüktemi kodakirnüka jembiaaka mesüra bilemaka alima nung US-i kechi ashir, kechi inyaker, kechi lemteter ta asüba sülen alima anidaker. Anungji asenok tamangertemibo Tsüngrem dang Donald Trump len anitsü, shisatsü agütsütsü aser alima tajungba yanglushitsü atema shisatsü agüjang ta sarasademtsü nungdak ama bilemer. Talisa alima nung Khristantem jenjang temai ajungkettsüsa aser alimai Tsüngrem tali meteta angatetsü atema pa lenisüba kübok sayatenya mapatem inyakang ta ang sarasademtsütsü langa lir ama bilemer.

OLEMSABANG

AROGO TENZÜKBA ASER RONGSEN KETDANGTSÜBA

~ Wati Longchar (Eralibill),

Tenzükba kechi

"Tenzüker" ta asüba ya tangatetba balala nung amshir. Nüchiso bushir dang "linük tenzüker" ta ajar; Government office balala nung inyaker ta "government kilir (servant)" ta aja; Bangdak yimsüsür dang "public servant"; NGOs balala nung inyaker dang "social worker", temang anema aliba mapa balala nung inyaker dang "health worker". Yamaji nübur tenzükba maparen balala aika nungja balala aika ashitsü akok. Mapa balala inyakba ajanga nübur tenzüktsü shimtetbaji maongka tulu, temoatsü ta bilemtsüla. Ibai nüburtem madak tashi amshitsü asoshi shimba masü, saka khuret ka amai agizüktsüla. Tenzüker kaji nüburtemi shimer, aser aji Tsüngremer temoatsü. Lenir shirnoki ibai Tsüngremer temoatsü ta angatetta ajemalu tenzükdir temoatsü, saka shibai iba maongka tashiyim aser ochimashi amshia nüburtem madak amshir parnok Tsüngremi jendoktsü. Yamaji alima yimli putu balala nung laoba otsü nung aznger.

Arogo nung Tenzüker Jakla

Arogo nung tenzüker dang "Tsüngrem lar" ta ajar. Arogo ya alima lokti tentet ka amai masü, aser tenzükba maparen yaa alima lokti tentet denji medemdangtsü makok. Arogo yabo Khrista zü agi alangzükba purtemi akümba telok ka lir. Khristai sayuba ama alima dang kangki apur iba temenen lima nung ochi indang kulisür asütsü Tsüngremi jatet. Kangki apuba, tetezü tilatiba akümba, tangar atema bendanga agütsüba, ochi atema tatem tashi noktaktetba lar. Iba jaklaji makara arogo nung tenzüktsü malang ta angatetdi.

Yisui alar indangji yamaji ashir, "Atangji Nisung Chir-a sünga pei tenzükdaksütsü atema masü, saka tenzüktsü aser aika alang pei taküm agütsütsü aru." Mark 10:45. Khonang-naroküm bushia, tashi toktepa, sentsü sayutepa inyakba telok ka masü. Arogo nung tenzüktsü ajaba purtemji Yisu Khristai sayuba ama kangki apur iba temenen lima nung ochi indang kuli asütsü Tsüngremi jatet. Yisui kilir aser alar ka ama nütsüngtem tetsüng shidoktsüba jagi pa tenzükba mapaji kilir aser alar mapa ama lir ta tatishitsü sayuba lir. Anungji arogo nung kobala tenzükba mapa sudir suang - chowkidar nungi pastor, deacon, committee balala nung tenzüker ajak "kangki" aser "alar akümba" tangatetba nung tenzüktsüla.

Yisu Khristai sayuba "tenzükba" aser tanü Ao arogotem nung tenzükba jenjang asadanga temelenshi adoktsü nungdaker. Tanü urban area nung dang Govt.i development ajak agütsüba ajanga yimtsüng nung tenzükner mali aser rural-urban telemsa aser tenzükba jenjang nung telemsa tulu adoka lir. Ano tanü individualistic aser consumeristic lima nung nisung ajak jangratema alitsü jenjang bushir. Kasa degree azüng, saka town arogo tenzüker aser yimtsüng arogo nung tenzüker ita sen, facility kanga dang tepila tulu. Ano tenzükeri angatetaka, tanüri aikati mangatetba ajanga mapa nung tamakok angutsüsa akümer. Anungji town nung tenzüktsü rakteper aser yangji mapa ngutetbaji jenjang tuluka ajangzük amai bilemer. Iba tebilemtsü ya Mungdangi aser nuburtemi aroka magira, tarutsü nung tebilemtsü aika ajurutsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

IRF-i Trump dang yimsü temeden atema inyaksü mepishi



February 04, 2025 nü Washington D.C nung International Religious Freedom (IRF) senden nung abelen nungi- International Center for Law & Religion Studies nung Director Brett Scharffs, World Food Program nung Executive Director David Beasley, Freedom House nung tatong Tir Annie Boyajian aser Congressional-Executive Commission on China nung policy & media Director, Scott Flipse nung shisa lemsatepba mapang tangokba noksa nung angur.

Washington D.C, February 05 (Agencies): February 04, 2025 nü Washington D.C nung International Religious Freedom (IRF) senden nung shilem agirtemi Trump administration dang alima tesem ajaklen tamangba yimsü temeden atema inyaksü mepishiogo.

IRF Summit nung shisa lemsatepba sentong nung shilem agirtemji International Center for Law & Religion Studies nung Director Brett Scharffs den World Food Program nung Executive Director David Beasley, Freedom House nung tatong Tir Annie Boyajian aser Congressional-Executive Commission on China nung policy & media Director, Scott Flipse nung shisa lemsatepba sentong nung shilem agirtemi Trump administration dang alima tesem ajaklen tamangba yimsü temeden atema inyaksü mepishiogo.

IRF summit ayongzükertemi ashiba agi, tamangba yimsü temeden atema adenshiba senden tulutibaji iba senden ya lir.

US nung sorkar tasenba aser Congress-i alima tesem ajaklen tamangba yimsü temeden ajungkettsütsü atema inyaksü imlar, ta IRF senden nung shilem agirtemi metetdaksü.

IRF senden tenzüka okila jembidang Ambassador-at-Large for International Religious Freedom (2018-2021) Sam Brownback-i, yimsü temeden atema ayongzükba senden tulutibaji ibai lir, ta ashi.

O lemtepba sentong nung

shilem agirtemi, alima nung tamangba yimsü temeden ajungkettsütsü atema parnoki Trump administration matsüngdang kechi onüktemsa benoktsüla, ta shisa lemsatepba liasü.

Freedom House nung tatong Tir Annie Boyajian-i, yimsü temeden atema inyakertemi iba ya tayongzükba tuluka lir ta ashir, ajisüaka iba nung ya maongka-a lir, ta ashi.

Laisa, "Tawa study balala ajanga tamangba yimsü temeden magütsüba mesüra tamangba yimsü temeden nokdangba linüktem 27 dang aliba nungi tangbo linük 40 kümogo ta bushitetogo. Administration tasenba aser Congress tasenbai yimsü temeden atema inyaksüla," ta ayongzük.

Laisa, "Tamangba yimsü temeden ajungkettsütsü atema asalentong balala benoktsü asoshi maongka tulu lir. Tang rongdak süa teinyaksü mapa kaji, yimsü temeden ajungkettsütsü atema senotsü teyari nokdanga aliba tesemtem nung iba tenokdangba agientsüla," ta ashi.

"Saru agütsürtem nungi bendenba sen ajakji tim nung indoktsü atema administration-i inyaksüla, ajisüaka Trump administration kübok yimsü temeden aser yimsü ajak amangertem atema benokba

program tem anenja lir," ta ashi. "Onoki inyakba rongdak program aika lir aser Afghanistan, Egypt, Vietnam aser Nigeria ama linüktem nung nisung 150-i teyari kanga nüngdaker, anungji mezüngbuba nung senotsü lenmang nokdanga aliba agientsüla," ta laisa metetdaksü.

Boyajian-i, "Trump Tir inyakba mezüngbuba 'term' nungbo Ambassador Brownback den senteper item temeden balala kümzüktsü asoshi inyakogo. Item mapa tajung maneni inyaksü maongka lir," ta metetdaksü.

Brownback-i, "Tamangba yimsü temeden ya Tsüngremi meimchir nem agütsüba temedentem rongnung tiyongtsür, anungji iba ya kümzüktsüla aser sorkar ajaki iba temeden agüja akhümtsübuttsüla," ta ashi.

Paisha, "Alima tesem ajaklen tamangba yimsü temeden ali asübo nisung jenti tepsetba ya melila, kechiyong nisung jenti tepsetbaji talisa minorities dak ataloker," ta ashi.

Boyajian-i, "Khristan ka ama aser tamangertem ama tamangba yimsü temeden atema asenoki inyaksüla. Meimchir ajakji senti aser Tsüngrem mesükba nung yanglu, anungji takoksa angurtem asenoki kümzüktsüla aser yaritsüla," ta ashi.

Indonesia nung Khristantem sentong ka anema longkak ait

February 05, 2025: Taoba hopta Indonesia nung Islamic telok balala nungi Muslim nungertemi Central Sulawesi Province kübok Khristan sayutsünger ana anema longkak ait.

January 17 aser January 24 anogotem nung Islamic teloktemi longlok aitba sülen maneni January 29 nüa Province yimtiba, Palu nung longkak ait.

January 30 nungi February 2 tashi World Impact Ministries nungi sayutsünger, Peter Youngren aser Swiss nung shisa lemsatepba sentong nung shilem agirtemi Trump administration dang alima tesem ajaklen tamangba yimsü temeden atema inyaksü mepishiogo.

Iba sentong ya yimsü balala amangertem ajak asoshi ayongzükba liasü, saka Islamic teloktemi longkak aitba ajanga

ketdangsertemi iba sentong nung Khristantem dang adentsü asoshi temelaba agütsü.

Islamic Community Alliance (Aliansi Umat Islam, AUI) aser Muslim Community Forum (Forum Umat Islam, FUI)-i January 29 nü Khristan sayutsünger ana anenzüka aliba Aston Hotel kima adenshir tena anema longkak aitba den külemi Friendship Festival agitsü aliba tesem nokdang aser iba sentong thinenang ta takhangba agüja liasü.

Iba Festival ya Central Sulawesi nung aliba Communio of Churches and Evangelical Institutions (Persekutuan Gereja dan Lembaga Injili, PGLI)-i ayongzükba liasü.

Osangbener den jembidang Youngren-i, "Muslim

nungertemi longkak aitba ajanga ni mejashir, kechiyong temeden agüja aliba linük ka nung sensotemi longkak aittsüji tim dang," ta ashi.

Paisha, "Iba sentong ta nisung ajak den Tsüngrem temeim lemsateptsü atema liasü, kechiyong mental health anema alitsü, takok angutsü aser tesünap atema Tsüngrem temeim angatettsüji tongtibang," ta ashi.

Central Sulawesi nung Governor, Rusdy Mastura-i, Friendship Festival ya Khristantem atema dang lir, anungji tesünap meraksatsüla, ta metetdakja liasü.

Indonesia nung nütsüng shilem 11.43 dang Khristantem lir aser evangelical nütsüng shilem 3.23 lir.

ANOGO ABEN TSÜNGREM DEN

KIBUBA KÜ TEIMLA

Na kü teimla lir, Oh Kibuba, O Kibuba, asangwa nungi na kü mulung alemdak. Taso dang nungi ni ne dak metaloker, kütsü nu menden nungi ni agitetbaji na lir; Maneni ni naasangtsü. ~ **T.Ken 71:5-6**

Meimchir taküm kati aiben rongsen dak temulung alemer. temetetba aser khonang nüngsang nung imlar, nisung akhüm dak temulung alemer, aser yamaji tarutsü teimla jenti yur taküm jajaa aodang aiben takoksa angur aser aji aseni meshisadanger.

Tanü azüngtsü Lai ajanga ashir, Kibubaji dang asen tanela taküm teimla rongnentsü, Pa dak amanga aser Pa dak temulung lema lira kodanga tejashi mali aser tesama mali. Kasaji alima taküm nunga Kibuba dak imlaa, pa dak tamang kaa lira temoatsüba taküm süa alitsü aser tarutsü taküm lenmang nunga mesamatsü.

Shibai Kibuba pei teimla aser mulung lemtetba kümdaktsür pa temoatsüba. Anungji tesamatsü lenmang nung masü, tesamatsü osettem nung masü, rema oadokba ali sentsüwangshi nung masü saka Kibuba shibai mangli sangwa asenok anüker aser anogoshia teimla agütsür pa dak amanga, temulung lemteta alitsü tamanger shia merangdi ta ayongzüker. Amen.

Mission Aviation Fellowship tentetsang,JackHemmings süogo



Jack Hemmings

February 03, 2025: Mission Aviation Fellowship (MAF) tentetsang aser World War II nung shilem agir, Jack Hemmings alima nungi pilaogo; pa arrshi küm 103 liasü.

1940 küm pa arrshi küm 19 asü dang pai tayimtsü nungi raraba nung shilem agitsü melungteta liasü. World War II mapang pa British India-i aru aser Imperial Japan sepaitem anema raraba nung shilem agi. Iba rara nung pai tasü itta shilem agiba atema pa nem Air Force Cross award agüja liasü.

World War II tembangba sülen Hemmings-i taoba mapang külem sepai Stuart King den senteper Mission Aviation Fellowship (MAF) tenzüka liasü.

1948 küm tenati Miles Gemini tayimtsü ka nung ita trok tashi central Africa tesem balala sema senzüa region balala nung

nüburtem nüngdak balala asadanga liasü. Kenü anogobo tena mena aliba tayimtsüji tsükok saka tenaprong kümzük.

Tanübo Africa nung MAF indang tayimtsü 120 lir.

MAF ya Khristan organization ka lir. Parnoki Africa tesem ajaklen tayimtsü ajanga mozü densema teyari balala belena nüngdakbapurtem yarir.

MAF UK nung CEO, Donovan Palmer-i, "Jack dak ajemalu shisatsü aser azüngmeyaka alirtem pai nendaka yariba ajanga ni kanga kongshia liasü. Jack taküm ajanga alima nung nisung aika kongshiogo," ta metetdaksü.

RAF Chaplain in Chief, Giles Legood-i, "Kanga sensakba linüktem nung Jack Hemmings ajanga taküm aika nung temelenshi bener arutsüogo," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Teimba

(adj) zünya nung tali (more in number)

* Asen lima nung lisopurtem dangbo tsümar teimba kümdagi.

Teindang

(adj) ochi mulungjang, tangatetba shitak (righteous)

* Teindang nisungtemi yimsü asüdang alima junga renloker.



Tir Yimyim

OLONG PAITEP # 7056

1		2		3		4	5			
				6						7
		8								
9				10		11				
			12					13		
						14				
16						17				

TIPLIN

1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga bulu - (5)

OLONG PAITEP # 7055 TELANGZÜBA**TIPLIN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA

China nungi chef Li Enhai-i noodles tapotiba yangluba atema Guinness World Record ka yangluogo. Enhai yangluba noodle strand shiaji 0.18 mm temelem liasü aser iba ya koujang dang nungi tapoba lir.

Iba ya masüdang Enhai-i 2010 küm Italy nung 'Lo Show Dei Record' nung noodles 0.33 mm (0.01 in) yangluteta otsü tasen yanglua liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Asam Xahitya Xabha nung Rs 5 crore alang kakettem ayok

Pathsala, February 5, 2025

(Agencies): Pathsala nung Asom Xahitya Xabha indang 77 buba Biennial Session nung Rs 5 crore jungnua indang kaket ayokba atema otsü tasen ka yangluogo.

"Asam Xahitya Xabha nung anogo pungu tsünga Rs 5 crore alang kakettem yokogo. State sorkari 2025 küm 'Year of Books' sangdongba ajanga nisung aika ajungmesogo" ta Book fair secretary Subhash

Ray-i ashi.

Assam Chief Minister Himanta Biswa Sarma-i Pathsala Asom Xahitya Xabha Session nung kakettem alizütsü ayongzüka liasü.

Pathsala nung tongti tesentepdak Bhattadeva Kshetra semdangdang pai iba tayongzüka agüja liasü.

"Northeast nungi nisung lakh 30 temai anogo pungu tsünga Asam Xahitya Xabha semdangogo" ta organising committee Secretary Giridhar Choudhury-i ashi.

"Onoki public atema gari aika yangluogo aser Bajali district o police administration-i onok pusema yariteper" ta paisa ashi.

CM Sarma-i Guwahati airport nung terminal tasen lapoktsü

Guwahati, February 5, 2025

(Agencies): Assam Chief Minister Dr. Himanta Biswa Sarma-i Lokpriya Gopinath Bordoloi International (LGBI) Airport nung upgradation project lapoktsüogo.,

LGBI Airport nung expansion aser modernization project nung mapa aika inyakogo.

LGBI Airport nung Front

Platform 270 sq. m. nungi 1000 sq. m. yangluogo aser additional footpaths 900 sq. m. metenlok.

Airport nung entry lanes 8 aliba nungi 14 kümogo aser departure lanes 3 nungi 4 aküm. Maneni check-ins tekaraba asütsü atema DigiYatra gates tasen 4 lapokogo.

LGBI Airport nung security screening area 300 sq. m. aliba

nungi 450 sq. m. kümogo aser screening queues o upgraded furniture talila bendenlok.

Airport nungsa 140-meter architectural wall ka yanglu aser tobur jungdaksütsü atema 300 sq. m. garden yanglu.

Assam nung mazüngtiba airport ajungketba ya passenger traffic teimba koktettsü aser latest aviation standards nung lateta aliba ama inyakogo.

Manipur nung agriculture ketdangsür ka kidang bomb yua liasü

Imphal, February 5, 2025

(Agencies): Imphal West district kübok Singjamei police station anasa sorkar ketdangsür ka kima nung hand grenade tesashi ka yuja aliba angu.

Iba bomb ya state government agriculture officer ka kima nung yutsüba liasü aser ghonda 24 tsünga bomb ana tashi amshia state agriculture department amokmerenogo.

Department nung ketdangsür Asem Ranjit'er kinungertemi aonung 10:00 ako meta bomb angu. Pa ya Kwakwa Huidrom Leikai nung

alir aser police dang sangoktsüba sülen aonung 11:00 ako tashi nung bomb disposal experts arua raksaa endok.

Iba tatalokba atema ketdangsürtemi ken o ka benokogo aser bushisüngdang südar.

February 3, 2025 nü Agriculture Department Executive Engineer Nongthombam Munindro kidang improvised explosive device (IED) ka anguba sülen ano Ranjit'er kidanga bomb angu.

Bomb amshia amokmerenba

atema Nongmeibung nung lanurtemi Mongulbarnü Nongmeibung Bazar nung Kusum Oil Pump anasa mener lungkak aitba sentong ka agiogo.

Iba sentong ya Eastern Students' Club, Nongmeibung Women Development Meira Paibi Association (NWDMPA), aser SAKWO, Rajbari-1 teloktemi ayongzü.

Lungkak aitertemi bomb amshiba amokmerenba aotsü aser civilians anema kiralongraba mapa inyakba anentsü takhangba agüja liasü.



Udalguri district kübok Tangla jila nung Tangla Veterans Association indang 32 buba Annual Conference and Get-Together nung nüngshilung jakdang naro yuja tetushi agütsüba angur. Iba sentong nung President Ex-Subedar Sidhi Ram Nath aser Secretary Ex-Havildar Hareswar Boro nati organizational flag sala aser taküm bendanga agütsür nem tetushi agüja liasü. Sentong nungsa 81st Field Regiment, Indian Army Commanding Officer Col. Pradeep Singh Tumar aser District Sainik Welfare Officer, Darrang, Col. (Retired) Prabhu Nath Giri na aden.

Gaza yanglushitsü atema US-i agitsü: Trump

Washington, Tsüklai/February 05 (Agencies): United States Tir Donald Trump-i ‘extraordinary redevelopment plan’ ka kübok Palestine nungertem dangalen oa lidaktsütsü aser US-i Gaza agia kibur akumtsü aser iba tesem ya “Riviera of the Middle East” kumdaktsütsü ta ashi.

Israel nunger aser Palestine nunger tsüngta küm aika raraba nung US sentong khenyongi melenshia Mongulbarnü sangdongba mapang, par administration-i anir iba tesem yanglutsü aser nüburtem nem zünger mezüngmai mapa aser talitsü ki agütsütsü, ta ashi.

“US-i Gaza Strip agitsü aser yangji asenoki mapa ka inyaktsü. Asenok kibur akumtsü,” ta Trump-i White House nung Israel Ato Kilonser Benjamin Netanyahu den jembishinüba sülen ashi aser raksatsür aliba ki o jen mürektettsü aser lendong tulu aliba bomb mapok aliba aser danga nok nü raksa indokba maparen par administration-i inyaktsü ta ashi.

Gaza yimsü asüba Palestine nunger telok Hamas-i kanga kera iba sentong aitsü aser ibai region nung makmakshimak adokdaktsütsü asoshi “recipe” ka lir ta ashi.

“Gaza Strip nung aliba ozü nüburi item sentong magizüktsü,” ta iba teloki sangdong ka nung ashi.

“Pei li nungi meindoktsü masü saka ozü nübur anema tashiyim amshia amokbangba tatem kati arutsü nüngdaker. Ita 15 dak tema bomb poklokja Gaza nung nüburtem tesem balala nung prokshidaktsüba aser anidokba sentongtem ozü nüburi meindokogo.”

Trump-i sentong khenyongi balaka benokba ajanga Israel aser Hamas tsüngta ceasefire atsülangtsü asoshi ano

jembishinütsü aliba mejangjai akumer.

Mezüng anogo 42 rara anena ataba nung Israel nunger pua alir 33 chioktsü aser Palestine nunger tepuokdak alir nisung 2,000 jungnüa chioktsü aser iba mapang March 1 nung tembanger.

Mongulbarnep Hamas odongtar kati ceasefire noklem tanabuba atema jembishinü tenzükogo ta shia liasü. Yangji mulungtepra, Gaza nungi Israel nunger sepai ajunga ainshitsü aser pua alir ajak chioktsü.

Trump-i iba tezüngzüktep indang tashi nung temulung malemba ashi.“Asüng nungi tenzüka amaktsü akok,” ta Trump-i ashi.

Gaza yanglushitsü sentong indang sangdongba mapang, US-i “long-term ownership position” agitsü akok ta Trump-i ashi.

“Iba telemtetba ya züba-züba agiba masü. United States-i iba ali tilaka agitsü, yanglutsü aser mapa meyirijang aika agütsütsü atema ni jembir ajungai junga agizüker,” ta pai ashi.

Pai indang sentong kar tejangja rateta ashidang, Gaza nung pei ki yutsür tesem balala nung prokshia aliba Palestine nungertem pei jangraba danga linük temi aotsü, ta Trump-i imlaba lemsatep, ajisüaka Palestine nunger yangji maneni alitsü ta ashi.

Gaza ya “world’s people” indang ki akumtsü akok, ta US tiri ashi.

“Iba tesem ya international, tamamangtsü tesem ka kumdaktsütsü. Gaza Strip nung aliba sempet ya tamamangtsüka. Aser alima ajunga nungi teshimtet nisung yangji alitsü. Palestine nungera yangji alitsü,” ta pai ashi.

“Nisung aika yangji alitsü.” Gaza nung tensa aziüktsü asoshi US sepaitem yoktsü asü

ta asüngdang dang, Trump-i yamaji inyaktsü akok ta langzü.

“Gaza asoshi kechi nüngdaker aser asenoki inyaktsü. Nüngdakra asenoki aji inyaktsü,” ta pai ashi.

Netanyahu, shibai Trump ya Israel tembar tajungtiba ta tushia jembir, paia US tir indang sentong nung temulung agütsütsü nüngdaker aser puti otsü melenshitsütsü akok, ta ashi.

“Iba ali tilaka atema pai tarutsü balaka angur, kong kiralongra kanga liasü, asen anema amakba jenti liasü, yipru-mopung jenti liasü,” ta Netanyahu-i ashi.Trump-i iba osang sangdongba ya Palestine nunger bhukumer temi kanga sashia aitsür.

“Tang US sentongji Palestine nunger raksatsütsü, Palestine nungertem kidanger linüktem nung prokshia lidaktsütsü aser Palestine nunger li nung US tatem maka kibur akumtsü pai ashir. United States tir nungi iba ama sangdong agütsüba ya asenok koba planet nung alirar ni memetet,” ta political analyst aser human rights advocate Omar Baddar-i ashi.

American-Arab Anti-Discrimination Committee (ADC) nung executive director Abed Ayoub-ia Trump sentong ya kangasa majung aser tesüngmangtsüka lir ta ashi.

Atlantic Council nung resident senior fellow aser Palestinian American, Ahmed Fouad Alkhatib-i Gaza ya United States sorkar kibur akumtsü mesüra agitsü atema “real estate development project” ka masü ta ashi.

Democratic lawmakers temia Trump sentong ya aitsü.

US Congress nung Palestine nunger züngsem Rashida Tlaib-ia, kin ajunga okshia samatsür war criminal ka den mena yur yimjak nung kin ajunga samatsütsü atema jembir ta Trump aitsü.

Connecticut nungi Democratic senator Chris Murphy-ia Trump sentong ya kidang mangatettep aliba nung temulung agüja aliba anizüker aotsü merangba lir ta ashi.

Trump-i aiben Egypt aser Jordan dang tesem balala nung jenshia aliba Palestine nunger agizüktsü ayongzük, saka Arab linüktemi magizüker aser yangji alirtem tesem balala nung lidaktsüba ajanga region nung rara tuluba akumtsü aser “two-state solution” merangba nung tamakok ajurutsü ta ashir.

Ayatollah-i pa tenüng nung nokdaktsü atema Qassem shim

Tehran, Tsüklai/February 5 (Agencies): Iran lenir Ayatollah Ali Khamenei-i, Lebanon nung pa tenüng nung nokdaktsü atema Hezbollah lenir Naim Qassem shimogo, ta Iran media sangdong balala ajanga Bodhbarnü metetdaktsü.

"Revolution lenir-i sangdong ka ajanga Lebanon nung pa tenüng nung nokdaktsü atema Hezbollah secretary general Sheikh Naim Qassem shimba sangdongogo," ta Tasnim news agency-i metetdaktsü.

Tasnim news agency-isa, official decree indang copy ka sayuogo, kong Qassem-i Khamenei tenüng nung Lebanon nung non-litigious ken o tem aser tamangba yimsü dak sendakba nung inyakyimtem achaayangtsü, ta shia lir.

News agency yagi ashiba agi, Qassem jakdang Hassan Nasrallah-i kasa mapa ya bener liasü, shiba taoba küm September 27 nü Israel-i anüng ajanga south Beirut amakba mapang tepseta liasü. Hezbollah ya "axis of re-

sistance" nung densema lir. Iba telok nem ya Iran-i teyari agütsür aser parnoki Israel aser parnok tembar US anema inyaksangshia arudar.

Khameneim, shibai Iran nung tatembangbuba obendang agütsür, pa tenüng nung nokdakertem Iran indang province ajak nung lir, aser item nisungtem yagi religious fund tem bendentsüla aser parnok nem nongloktsüba mapang shitak benoka inyaktsüla.

Nasrallah asüba sülen ano mapang tatsüka dang lir pa melentsü imla alisang Hashem Safieddine-a tepsetba sülen Qassem ya taoba küm October ita Hezbollah lenir asütsü shima liasü.

Hezbollah puri Nasrallah aser Safieddine naprongla den February 23 nü yimjak nung tepila sentong agitsü renema lir. Tensa mejungi aliba agi parnoki asüpila sentong magi-i aruogo, saka Israel den rara anentsü atema tenangzütepba yangluba sülen tang iba sentong agitsü telemtetba agiogo.

Goma nung alirtem tasü mang 2,000 aremtsü ariteper

Goma, Tsüklai/February 5 (Agencies): Democratic Republic of the Congo anütoklen Goma yimti nung alirtem, ceasefire benoker aliba mapang taoba hopta yimti nung raratepba mapang asür 2000 shi aremtsü atema aritepa inyakdar, kechiyong iba ajanga tashidak prokshia yoktsü ako ta tsübua bilemer.

Rwanda-i teyari agütsüba M23 telok shirnoki Goma atsünga liasü, parnoki Hombarnü ceasefire ka benokogo aser tang tashi aibelen memenai arudar, ajisüaka yimti nung alir kari ashiba agi, Mongolbarnü tesem kar nung khatepba aser rakzürakdemba atalokogo.

Yimti nung alirtemi bomb agi raksatsür aliba kitem asadanga ao aser tasü mang agi sünger aliba morgue tem azüngtettsütsü merangogo. Taoba hopta raraba mapang nisung 2000 dak tema asüba tasü mang Goma nung aremtsü nüngdaka lir, ta DRC communications minister-i ashi.

Goma atsüngtsü atema raratepa iba yimti atsüngba mapang tashi nung nisung 900 tepsetogo aser nisung 3000 shi yirua liasü, ta United

Nations-i ashi.

Civilian tem yiruba indang osang maneni angashidar aser mozüktem nung yirur alir aser asürtem anepalutsü atema kanga timtepa arudar. Kasa mapang nung yimti yimtungtem nunga tasü mang aika mepidaka lir.

Katoyi kiyong nung alir Julienne Zaina Barabara-i ashiba agi, lar chir ka taoba hopta tepsetogo aser lar ki anasa bomb ka apokba sülen lar chir ana yirua liasü.

"Onoki parnoki mozükidangi anir ao, kong kabo ghonda asem sülen süatok. Tanungba ana ya tang tashi temang anepaludar. Tena temang scan süogo aser ka dakbo tekolak nungi shrapnel magizüki lir," ta lai ashi.

Taoba hopta anogo ishika power maliba ajanga morgue tem nung refrigeration dak kongshi aser iba ajanga tasü mang jangjatsü asoshi kanga aritepa inyakdar, ta Goma nung Red Cross sub-delegation indang International Committee tekolakba Myriam Favier-i ashi.

"Goma nung tasü mang aremtsü atema ali kanga ajema lir," ta laisa shisem.



KÜPZA SENSO MUNGDANG

Küpza: Mokokchung - 798601: Nagaland

TENÜNGSANG AGÜTSÜR

Tsürabur Wb. A. Katiba Longkumer aser Asür Purtola Imchen na jabaso **WB. TINUMAYANG**, sorkar wadang nung temaba menden ajangzükteta Deputy Director/ Sr. SDEO nungi Joint Director/DEO School Education Department jenjang tongtetba asoshi Küpza Senso Mungdang ajanga pa nem tetushi aser tenüngsang agütsür.

Tsüngremi maneni nü takum aser wadang tarutsü anogotem nunga moajangma.

Sd/-
Wb. Lanukaba
Sanen Luden Tayonger
Küpza Senso Mungdang

Sd/-
Wb. Imoangba
Tongti Zülur
Küpza Senso Mungdang

Halep tennis asaya nungi anenogo

Tsüklai/February 5, 2025 (Agencies): Taoba mapang world number one asayar aser Grand Slam ana koker alila Simona Halep-i Mongolbarnü Cluj nung mezüngbuba round nung tsükba sülen la profesional tennis asaya nungi anentsü telemtetba agiba sangdongogo.

Halep, shiba tenokdangba agütsür aliba mozü amshiba atema la indang career nung kongshia liasü, la 2025 kum mezüngbuba asaya nung Italy tsür Lucia Bronzetti-i 6-1 6-1 agi akokba sülen asaya nungi anentsü telemtetba agiba sangdonga liasü.

Arishi kum 33 tain Romania tsürla ya temekok aser tapu nung tashiba aliba ajanga season tera menor tenzüka liasü. "Ni jashiseta asü pelasete anener mejangja kechiyong ni anaprongla ya ajangshidar, saka ni yimjung nung iba telemtetba agiogo," ta Halep-i BT Arena nung sentepa aliba lokti dang ashi.

"Kü temang agi taoba mapang ama masayateti



kümogo anungji ni tanü Cluj-i arua nenok matsüngdang asayar tennis court nung salem shinüa liasü.

"Ni meyipa arutsü shibai metet, saka tang atemabo ni idaki tang tatembangbuba asayatsü. Ni mejepner, iba ya jangrademtsüka, ni world number one kümogo, ni Grand Slam kokogo aser taküm nung ni aginüba ajak agi ajidang. Taküm liyonga aotsüla aser tennis asaya nung anenba sülena taküm lir," ta lai ashi.

Tenokdangba agütsür aliba aginba sülen la tanaben asaya tenzükhitsü merang, saka

taoba ita temekok aser tapu nung tashiba aliba ajanga la Australian Open qualifying nung masayatet.

Halep 2022 kum October 7 nü nungi masayai lir taoba kum March ita nungi asaya tenzükhia liasü. US Open asayaba mapang la dak roxadustat putetba sülen tenokdangba agüja liasü.

2018 French Open aser 2019 Wimbledon koker alila ya ano la indang biological passport nung inyakyim meshidak aliba puteta liasü.

La nem ITIA-i kum pezü atema tenokdangba agütsü saka lai Court of Arbitration for Sport (CAS) nung ken o benoka takok ngua liasü. Laisa, metetsümonga iba mozü achi masü ta shiogo.

Kum 19 asayaba mapang Halep-i WTA titles 24 benogo, kong 2018 kum French Open aser 2019 kum Wimbledon akokba densema lir.

Maneni la tanga Grand Slam finals asem; 2014 French Open, 2017 aser 2018 Australian Open nunga asayaogo.

Changtongya nung Inter Dept football tournament asayadar



Bodhbarnü 5buba Inter Departmental Football Tournament 2025 tenzüka asayaba mapang DELTA COB Commander 12th AR, Major Kapil Pal-i asayartem den salema aoba noksa nung angur.

Dimapur, Tsüklai/February 5 (Agencies): Changtongya Sub-Division kübok 5buba Inter Departmental Football Tournament 2025 February 5 nü Changtongya Local Ground nung tenzükogo.

Iba asayamung ya SDO (C) Changtongya, C. Wanganunder mendenbuba sür Sub Divisional Departmental Co-ordination Forum (SDDCF), Changtongya-i ayongzüka asayadar.

Bodhbarnü asayamung Sub-Division kübok department 24-i iba asayamung nung shilem agidar.

Commander 12th AR alakteta jaoker liasü.

Asayamung lapokba sentong nung lokti pela agizükba o jembiba mapang C. Wangan-i, iba asayamung ayongzüka asayaba nükjidong tongtibangtibaji Changtongya Subdivision kübok sorkar department tem ajak tangatetep nung teka amteper inyaka aotsü asoshi lir, ta ashi.

Ajak senteper Changtongya Sub-Division kübok department 24-i iba asayamung nung shilem agidar.

ICC T20I rankings: Abhishek tanabuba jenjangi tuogo

Tsüklai/February 5, 2025 (Agencies): India nunger lanur batter Abhishek Sharma-i Mumbai nung England den tatembangbuba T20I asaya nung otsüsüsüsa run aika yangluba sülen pa ICC T20I rankings nung jenjang kanga junga kümogo.

Arishi kum 24 tain asayar yagi ball 54 nung run 135 yanglu, koba T20 internationals nung India nunger asayar kati run timtiba yangluba liasü. Iba asaya nung kanga junga asayaba sülen pa ICC rankings nung jenjang 38 tejakdangi tua tang tanabuba jenjang nung lir aser Australia nunger Travis Head point 26 agi dang memenepi lir, shiba maneni temaba jenjang nung lir.

Taoba kum tetenzüklen T20I nung mezüngbuba asayaba sülen Abhishek kanga kara temaba jenjang tongtetogo. Pai kanga junga asayaba ajanga pa India white-ball team nung tongtibang asayar ka kümogo aser pai tawa kanga junga asayaba sülen pa alima nung tajungtibatem rongnung züngoksemogo.

Pa tanabuba jenjangi atuba tetezü T20I rankings top five nung India nunger asayar asem lir. Tilak Varma tasembuba aser captain Suryakumar Yadav pongububa nung lir.

India-i tawa T20I rankings amokbanger arudar,

kechiyong batting nung dang masü saka bowling nunga Player of the Series Varun Chakravathy-i wicket 14 agiba sülen pa tanabuba nung lir aser leg-spinner Ravi Bishnoi-a jenjang pezü tejakdangi tua tang trokbuba nung lir.

4buba Open TT asayamung asayaogo



Bodhbarnü Multi-Disciplinary Sports Complex Tuensang nung 4buba Open Table Tennis Tournament nung takok angurtem tangokba noksa nung angur.

Dimapur, Tsüklai/February 5 (Agencies): Tuensang District Table Tennis Association-i ayongzüka February 4 aser 5 nü Multi-Disciplinary Sports Complex Tuensang nung 4buba Open Table Tennis Tournament asayaogo.

Ajak senteper iba

asayamung nung asayar 25-i kija aser tarep asaya nung shilem agiogo.

Tebur kija asaya final nung Beso Chang-i Mhasi tsükdaksü aser tebur tarep asaya nung Sangkap aser Kaimang nati YentiOungbou aser Toshikuang na tsükdaja liasü.

PSV-i Tyrell loan nung anirogo

Tsüklai/February 5, 2025 (Agencies): Manchester United defender Tyrell Malacia, season nung tanungba asayatem atema PSV Eindhoven nung loan nung oa denogo, ta Premier League club yagi metetdaksü.

Netherlands nunger arishi kum 25 tain international asayar ya yiruba ajanga ita 17 tashi masayai lir November ita nungi asaya tenzükogo aser tang fitness yanglushiba mapang ka lir.

Left-back asayar Malacia ya 2022 kum Feyenoord nungi pound million 13 yong United nung aden aser pa taruba season tashi asayatsü atema tenangzüktepba yanglur lir.

"Manchester United defender Tyrell Malacia, 2024/25 season tanungba ajak PSV Eindhoven-i loan nung oa asayatsü," ta United-i metetdaksü.

"Fitness yanglushitsü aser asaya atema renema atatsü asoshi meranga inyakba sülen Malacia asaya tenzükogo

aser Netherlands nunger international asayar ya Ruben Amorim lenisüba nung tiben asayaogo.

"Pa par linük nung oa Peter Bosz-i aniba club nungi season nung tanbuba asayatem ajak asayatsü mulungtepogo," takasa sangdong ajanga metetdaksü.

Mongolbarnü Dutch transfer window meshibang tsüngda iba tenangzüktepba ya yanglua liasü.

Malacia Manchester United nungi khen danga junga masayateti arudar. Pa 2022 kum Feyenoord nungi Old Trafford-i ao. England-i aoba sülen pa yiruba ajanga timtemdar aser taoba season tepeyong masayateti liasü.

Ruben Amorim-i aniba team yagi pa melener ka alizükogo. Parnoki arishi kum 20 tain Leece left-back Patrick Dorgu pound million 25 den pound million 4 add-ons bendenloker alizükogo.

BILEMDANGANG

"Nendaka inyakba nung temaotsü lir."